



MoU UNITEN, ITPLN kukuh sinergi hubungan Malaysia, Indonesia

Oleh [Essa Abu Yamin](mailto:essabuyamin@bh.com.my) - Januari 23, 2023 @ 6:34pm
essabuyamin@bh.com.my



KUALA LUMPUR: Universiti Tenaga Nasional (UNITEN) menandatangani memorandum persefahaman (MoU) bersama Institut Teknologi Perusahaan Listrik Nasional (ITPLN) sebagai langkah pengukuhan sinergi antara Malaysia dan Indonesia.

Menurut kenyataan Jabatan Komunikasi Korporat UNITEN, MoU berkenaan dilakukan pada Rabu lalu di Bali Indonesia atas kesinambungan daripada pertemuan Perdana Menteri Datuk Seri Anwar Ibrahim bersama Presiden Indonesia Joko Widodo di Istana Negara, Bogor, Indonesia.

"Dalam pertemuan berkenaan, kedua-dua pemimpin negara itu turut membincangkan pengukuhan sinergi di antara kedua negara.

"Turut mengeratkan hubungan kerjasama di dalam lawatan itu adalah Tenaga Nasional Berhad (TNB) dengan Perusahaan Listrik Negara (PLN) Indonesia," katanya.

Kenyataan itu juga berkata, UNITEN adalah cabang pendidikan daripada TNB dan ITPLN, cabang pendidikan PLN Indonesia menyahut baik seruan pemimpin kedua negara dengan menjalinkan kerjasama dalam pendidikan tinggi dan penyelidikan.

"Majlis memeterai MoU yang diadakan secara ringkas susulan daripada Mesyuarat Pengurusan Tertinggi Government-Linked University (GLU) Malaysia dan Aliansi Perguruan Tinggi Badan Usaha Milik Negara Indonesia (APERTI BUMN) Indonesia.

"MoU itu juga memberi peluang kepada pelajar di kedua-dua negara untuk mendapatkan pendidikan terbaik," katanya.

Beliau berkata, melalui kerjasama berkenaan, kedua-dua institusi pendidikan akan bekerjasama dalam program mobiliti pelajar dan juga kakitangan turut diadakan.

"Selain itu, program akademik termasuk penawaran dwi ijazah, kerjasama penyelidikan - geran sepadan dan penerbitan bersama, penganjuran persidangan antarabangsa, latihan, serta lain-lain bidang yang dapat memberi manfaat kedua-dua pihak.

"MoU itu ditandatangani oleh Naib Canselor UNITEN Dr Noor Azuan Abu Osman bersama Rektor ITPLN, Dr Iwa Garniwa M K, MT dan disaksikan oleh Pengerusi Universiti Berkaitan Kerajaan (GLU) Malaysia, Datuk Dr Mazliham Mohd Su'ud.

Sementara itu, Dr Noor Azuan berkata, kerjasama melalui MoU berkenaan akan dapat menghasilkan kajian ilmu yang dapat menyumbang kepada masyarakat sejagat dan penghasilan modal insan berkualiti untuk kedua negara, Malaysia dan Indonesia.